

快

園

詩

話

快園詩話序

江都張子老蘊曾以溟鷗集見示獲讀芝泉參軍詩已
卯冬乞假掃墓道經里門因故人許疏庵之子蘭墅得
交芝泉又讀其集概諸書蘭墅芝泉之壻也出芝泉所
輯快園詩話屬弁言於首僕碌碌久矣何足與言詩耶
第愛其大旨以師恩友誼爲重芝泉之師如袁簡齋畢
秋帆兩前輩洵千古傳人其他雖一才一藝各造其極
如畫中之張雪鴻明府奕中之嚴德音國手是也芝泉
之友實皆當代英奇之士如東亭之蘇雲巢姜種蘭蟬
浦之江立亭吳竹亭耳熟其行尤爲可欽其各隆情高

義固人所罕覩然亦芝泉之才與德有以感召之也芝
泉之圖如送行感舊乞詩紀年載入其中得古人未曾
有誠大觀也斯三者皆足信今而傳後詩句之佳轉爲
餘緒矣儀徵阮元撰

自序

蓋人之生五倫爲重余生也賤碌碌半生徒負虛名未
登仕版未得致力於君臣一倫襁褓失怙又缺父子一
倫及授室後奔馳四方間有歸時席不暇暖蘭溪弟復
供職衡工故於兄弟夫婦二倫亦多睽違惟朋友一倫
則視余如骨肉余亦視之如性命也是編多紀師恩友
誼初名師友錄後多增入者更名詩話卷數無定凡有
佳句儘可不賜隨到隨刊無分先後但病守一榻無可
查詢遺忘舛謬不知凡幾幸識者憐而諒之是所深禱
嘉慶二十五年忠孝節後一日江東快園居士凌霄芝

泉氏序

水間清海集卷一

快園詩話卷一

江寧 凌 霄 芝泉

巢鳳山房在金陵鳳凰臺側明韓方伯故居城中宅之
廣者居第二焉乾隆辛卯余生其間童時與蘭溪弟從
王楚堂師肄業師之子履泰題山房句云梧竹當窗淨
碧陰一邱一壑自深深偶逢花事舒青眼每感禽言憶
素心剛日讀經柔讀史醉時彈劍醒彈琴鳳兮羽翼丹
山養莫只長吟與短吟

乙巳歲放賑後家漸落徙居快園園乃明徵君徐子仁
故居武宗會雨幸中有宸幸堂麗藻堂晚靜閣浴龍池

諸遺跡余每款四方名士於中凡開百人之譙者九次
作圖咏詩故東亭姜五橋題圖句云曾開九度開壇坫
此是東南第幾回

余襁褓卽繼爲宗子隨丁本生父嗣父及承重王父母
艱嗣母及本生母皆建雙節孝坊後相繼見背故余應
布政司試恒尠楊煦夫見贈詩云百萬黃金撒手輕半
爲俠士半儒生軍營草檄烽煙靖河幕持籌水患平九
度開筵敦友誼十年讀禮負科名髭絲未改聲華馥大
鳥驚人在一鳴

余髫年與同社四十三人咏九日登臺城懷古詩就正

袁簡齋太史太史賞余安得送酒人白衣弔梁武之句
書其上曰此詩人也余欲見之由是委贄隨園故吳達
夫介寶贈句曰偶逃禪處得相親到底神交有夙因四
座客驚人似玉一編詩吐氣如春湘江鴻雪新留爪雲
夢烟霞舊染身曾記愛才袁太史要揩雙眼見詩人
鎮淮橋夷齊廟舊傳本王謝祠宣和年改祀夷齊太史
師題詩曰雙雕石象古鬚眉聞說宣和建此祠門外清
流千百折庭前孤竹兩三枝可知讓國全無怨未必興
歌果有詩薄薦蘋蘩君莫笑料應記得採薇時

李松雲守吾郡葺莫愁湖新之太史師作權歌曰勸我

楊柳好栖鴉勸種芙蓉待放花
拚取他年說遺愛甘棠都在女
兒家太守致太史書曰老前輩
乃一代詩史望筆下超生太史
乃改而存之

某太守妓禁太嚴太史師嘲之以詩曰
檠戟橫排太守衙威行八縣喚民
爺如何濟世安民畧只管河陽
幾樹花泣翠啼紅滿耳聞拋珠
賣釧路紛紛徒教胥吏添生計
名教何曾補半分果然國計有持
籌見解須從大處求江水自清
河自濁不聞天地廢河流大索橫
搜太費心想緣倖薄苦難禁不教
妓訴貪花客那好官分買笑金
女問三百置當墟齊國會供士
大夫此日聞聲喫虛

警彈章合到管夷吾十七史中循吏傳也會翻過百千
餘如何煮鶴焚琴事良史從無一字書不誅蠹賊翦柔
條 聖訓嚴如日月昭何不公餘常跪讀自然牌牒
早焚燒追溯唐虞太古風早留此輩可憐蟲三皇世有
洪厓妓曾載康熙字典中江左名臣有謝安東山功業
震人寰須知挾妓雖行樂也當蒼生一樣看青樓亦復
有英雄莫使芟除野草同罵賊當年毛惜惜絕勝胡廣
號中庸

畢秋帆師自書兩湖節署天香堂中聯曰綠酒紅燈數
載論心三鼎甲蒼顏玉樹一時把臂兩門生師狀元洪

稚存學使亮吉孫淵如觀察星衍榜眼王夢樓太守文治探花王蓬心太守宸最長余最幼也

制軍師留讀書署中張蒼雪幕府贈詩曰冰雪聰明界自天多君健筆態仙仙輕年脫稿皆名句異地相逢是夙緣賭酒肯居餘子下臨池直軼古人前他時宏景三層閣雲際應輸抱月眠

余隨制軍師平苗獻善後八策師頗稱賞姚星岩吏部左垣贈句曰裴果才高等八畧文鴛年少冠三軍

許秋巖官江寧太守感其詳題兩母節孝以師事之記其任漕帥時因公過某邑邑宰將陞武岡牧置辦漕帥

鹵簿誤書糟字漕帥以詩調之曰平生不作醉鄉侯況
復星馳速置郵豈有尙書加麪部漫勞邑宰贈糟邱讀
書字要分魚魯過客風原異馬牛閒說名區已陞轉武
岡可是五缸州

方子雲由歙寄居吾鄉齒高望重以師事之著花韻山
房集揚州江文叔已代梓文叔故後惜竟不傳記征苗
時見寄句曰吉甫旣聞歌六月鬼方何待伐三年詩多
警句姑就憶及者錄之五言則有樹合疑溪盡舟行覺
岸移邨僻居人少年豐事鬼勤雲過月東向潮來江倒
流七言則有鐙燄低知來日雨梅花遲憶去冬寒沙邨

苦竹梢無葉月夜征鴻背有霜山間土厚邨無井湖上
田礲米有砂空山雲與人爭路古寺風隨虎打門小庭
有樹堦鋪葉破屋無鐙月到床雨似春花容易落人如
晴雪最難留酒盡愁同不速客春殘花是未亡人人如
明月團圓少事比黃河轉折多事逢貧士謀偏拙座有
才人罵亦工百里故人如日遠空囊一笑抵河清貧遑
他願惟求健飲恐無名暫借游忽看綠柳真如畫似此
紅樓合有人無月小池痕自白不風高樹意先涼字殘
斷碣樵磨斧廟破無僧佛守門春信暖調時鳥舌雨絲
香入百花心四壁綠雲栽竹院滿身紅雨折花人窗風

疑鬼聲穿紙鐙燄如螢冷背牆目中敢謂空千古海外
原來有九州交廣易添離別恨學荒翻得性靈詩偶因
被酒雄心起每遇聞香妄想生野田禾黍雀聲樂驛路
風霜馬骨高天無雨雪春來早地有林巒月到遲羲之
尙恨無臣法顧愷真能讀父書夜涼深竹露初下樓黑
前山月未生老大漸思依骨肉文章枉說動公卿

太史師致陶衡川札書陶相公啟陶覆曰唐時本重相
公稱近日皆爲父老輕不是門生爭禮數門生門下有
門生

蔡芷衫著在山堂集自稱蔡子咏史句曰跨虎也知難

快園詩歸卷一
驟下攀龍何不竟隨昇就正太史師笑曰打油詩也蔡
愕然師笑曰菜子不打油何用聞者絕倒蔡贈余曰太
古元音何處尋箏琶競奏忽聞琴孫洪袁畢神仙侶目
以奇才愛服深老去頻爲伏櫪歌幽居無力挽頽波羨
君高咏能師古健筆真同返日戈

余偕洪稚存孫淵如飲酒家主人出紙索額洪書曰黃
公酒壚孫書曰孫楚酒樓余書曰牧童遙指處余秋農
見之題壁曰從來古迹難憑信只爲才人粉飾多

太史師命同人咏新燕賞余句曰知否有人相盼久小
紅樓畔杏花西蘭溪弟句曰侵晨偶傍欄杆立紅杏枝

頭見一雙朱鏡秋曰怪底曉來珠箔上一痕泥墮海棠
香朱春崖曰小苑新添花幾樹往來須要認分明

王伯華句曰憐我愁心似春草一番夜雨一番多姪鶴
鳴字雲岫號菊坪亦有句曰故人情意如黃葉一度秋
風一度疏

長子志鉅字式如號小芝初學詩咏龍舟句曰奪標捷
比珠探領破浪飛疑壁點睛

次子志珏字雙璧號小泉八歲時塾師出對曰燕語驚
春睡珏對曰雞鳴憶早朝余始命學詩

汪玉屏坤張老蘊鏐江素山謂及余合刊詩集汪曾與

余及老蘊石遠梅黃秋谷王柳邨胡眉峰同賦小秦淮
春曉曲汪末句曰勸郎莫向西家住西家樓高天易曙
衆幾擱筆

老蘊著求當集精鐵筆工書畫曾贈余曰苦雨酸風一
卷詩賞音真悔獲交遲廿年顧曲無同調半日論心卽
故知至味豈殊人嗜好雅輪還仗子扶持而今難覓隨
園叟悵望雲天有所思

劉卧松曠著無依集有句曰懷家下里敬亭山心自勞
勞夢自閒不但欲歸歸不得音書還在有無間

許蔬庵祥齡著蔬庵詩草有句曰見家門對海河開海

水煎茶奉一椀莫怪味鹹嫌不美郎君原爲買鹽來

太史師最賞燕山南補琴詩不修爭得到仙翁之句又
戰馬曰因行沙慣蹄成鏤見殺人多汗亦紅

何南園戒酒逢杯心又轉之句師亦賞之

陶怡雲都曹元旦送詩隨園曰才拙久瞠詞客後今年
先作送詩人

沈香谷見贈曰與君相遇卽相親天下誰能更絕塵擲
果共驚花縣客論詩曾識草堂人池深墨吐雲根溼竈
小茶煎雪蕊春渭北江東思耿耿莫因風雨再傷神
王博之見贈曰之子東南美空羣擅令譽風流居白下

詞賦觀黃初戶大無人匹書淫許我如偶披卷裡句似
有暗香舒

贈余聯者沈素芬曰郝超好客真名士裴果從戎尚少
年梁湘屏曰早年傳誦元才子到處逢迎陳孟公吳玉
田曰畫裡園林開白下卷中詞賦壓黃初石蕙佩曰風
騷骨帶三分俠湖海人傾八斗才朱漱坪曰傲骨有時
因醉輒閒身終日爲詩忙袁嘯竹曰吳中烟月留名士
白下雲山憶主人

江素山書張子澣贈聯曰蘊藉山公度風流水部詩

余四十生辰王察庵太守祝詩曰酒進黃花介壽辰知

君最是弟兄親公卿可致都因嬾鄉里皆周不憚貧治
水七篇真足法論兵八策竟如神風流瀟灑情無改四
十人猶二十人

余幼多師除詩文受業外學字於張斗堂學畫於張雪
鴻學篆刻於胡石畊學騎射於龔俊飛學技勇於甘九
苞學推步於梅堯夫學音律於朱松濤學奕於嚴德音
學琴於姚蒼然雖無一成頗得名師今無一存者矣偶
閱蒼然先生所著琴旨弔之曰七絃指授感深恩人去
餘音已不存賸有半焦琴挂壁當時弟子亦銷魂

孫淵如觀察書朱竹君句見贈曰小學劉臻吾輩定麗

快園詩話卷一
八
詞庾信早年成汪劒潭太守書趙雲松句見贈曰後世
不傳應不信古人如在復如何

余詩已刊者江寧之快園集懷寧潘蘭如之詩粹蘇州
石遠梅之同音集鎮江王柳邨之酌雅集揚州之溟鷗
集泰州之停雲集東臺之海上題襟集如皋之蠓山聯
唱集通州之蒲上題襟集石芸亭之同人集汪月樵之
淮海同聲集孫淵如之芝泉集概

快園詩話卷二

江寧 凌 霄 芝泉

余自弱冠出游至四十七歲病廢三十年間萍蹤無定
歷舉游止之處以誌適館授餐之德游于湖止澗南山
莊游都門止金聲棧游楚中畢秋帆師客於兩湖節署
從征苗匪之役客永綏鳳凰各行營止沅陵行館再游
楚中張菊坡廉訪客於漢鎮白蓮教之亂隨營無定所
返漢陽劉晴帆太守館於郡署之鳳鳴堂游琴川吳荆
璧館於虞山官廨兩游吳門一客胥江官舫一客雙桂
樓屢游邗上江鄭堂客於演法盦蕭晴岩客於九標書

室張老蘊汪智泉胡丙皋諸君客於月隱禪林江南厓
少泉昆季客於栢香堂劉卧松客於停雲館張竹泉客
於小秦淮冰榭貴巍卿客於休園江素山客於單椒山
館游瓜步閭繇園客於司馬署游真州客玩江樓游清
江兩度一客贊化宮一客崇實書院游安東客河工料
厰游淮安客權使關署返里朱白泉觀察館於巡道署
之聽笛園復移楊藩署之瞻園游京江客郡署山樓兩
游吳陵一客守尉公館一客應試館舍三游東亭一何
涵川客於水月庵一周琴生客於海燕草堂一金詠堂
石渠喬梓姜種蘭蘇雲巢客於纂志總局游安豐程魯

山客於見山樓兩游雉皋一黃孺子客於藥王廟一冒
耕南客於舍桴庵兩游蠟山一梁湘屏客於文星樓江
立亭移榻於碧霞山館一繆子嘉吳竹亭客於同仁堂
游茗海繆儉亭客於二忠祠兩游蒲塘一陳柯山吳香
湖客於紫薇道院一姜小琴客於柯珊書屋游崇川尙
守聞僖敬亭客於藏經閣游海門梁研溪客於署前公
館爲東道主者游古豐則有徐詠堂雪門珠浦游魚彎
則有歐陽棣之游馬塘則有趙雨峯游曹橋則有朱冠
虹雨林游霜甸則有叢罕山游新地則有李蔭環游東
洲則有沈雙溪游林梓則有沈酌亭椿圃闖仙墨庵密

庵蔭秋希倫雖友情最厚而移徙無寧曾有詩曰身似
楊花不自持東西南北任風吹哀蟬畢竟栖難穩又咽
殘聲過別枝

秋帆師留讀書時歲值大比將歸應試師欲有所贈余
以家道尙裕辭師遣使送至家使陳二千金於几曰制
軍所贈又六千金曰眷屬諸人所饋舉室愕然蓋歸後
始知也師故後再至楚中故有一斗眼中淚千金國士
恩重過大梁道不見信陵門之句

張菊坡在鄖陽贈余八百金陳梅邨在沌陽亦有五百
金之贈以近年論兩游蠙浦三游何阜兩游蒲上各處

因余所費皆將千金平生友朋遇合可謂幸矣及病後
遠近饋問絡繹於道因有句云莫可如何寒士病有加
無已故人情

吟侶佳句歲久多忘集快園詩最多僅記李漁衫曰名
士總無天塹隔好風憑送德星來洪稚存曰莫怪比來
歡譙數承平容易得歸耕陳理堂曰百年老樹留殘黛
一笑蒼顏發醉紅江鄭堂曰客比東南竹箭多催詩擊
鉢太煩苛主人却愛狂奴態約我看花日日過何允軒
曰前明徵士留遺居木石池亭猶有餘庾信亦佳宋玉
宅古有其事今其殊快園主人性好客結交海內無遺

珠手持玉塵登高呼知名之士皆吾徒吁嗟乎前代居
停骨已枯生時高會如斯無酒酣耳熱發狂論昔人未
必當過吾君不見六朝王謝多第宅於今故址皆饌餉
周筠泉曰快園雅集天下傳早樹赤幟專詩權飛來時
鳥欣有託人生何者非前緣尙祈通波易漕力毋令抱
璞長江邊光範之曰白下仙郎舊有名詩情史意喜相
評莫看雅會尋常事漢上題襟歲幾更王柳邨曰半世
知音在千秋高會難德星今日聚江左此騷壇張遠春
曰蕭辰復此集朋簪未了登高感舊心怕向衆中題姓
氏青袍廿載酒痕深張寄槎曰詞壇終古在名士過江

多郭頻伽曰名士半隨雙槩到好山親送六朝來許春
卿曰風雨重樓讌湖山過客情水光如此淡秋氣本來
清古意見前輩高壇多舊盟相逢漫相別空羨二難并
欽絜堂曰高會恥不與闖然跨疲驂入門不衣冠叙禮
厭煩苛落落七十人四座微吟哦大約江南北騷客繁
星羅精華半聚此意興不可磨田鶴舫曰共領佳招八
十人一人才藻一番新誠知此集堪千古自愧難扶大
雅輪孫淵如曰他年幾輩重經過手拂紗籠壁上題袁
蘭邨曰名士如山入座多李小白曰凌家兄弟總仙才
白下龍門兩扇開八月芳樽臨水設一時名士望風來

屠琴鳴曰過江名士望如仙麈尾清談接四筵一代文章還我輩六朝幫屐又當年餘載快園集

何阜席上咏食物姜種蘭淡菜曰出海全將水性更七
字最壓卷金鋏蕉鹽蒿曰雪舞長空輸柳絮雨餘滿地
襯蘆芽周琴生鮓魚曰三五捕來絲網細百千挑上竹
籃多蘇雲巢菊菜曰易觸秋懷惟老圃不虞歲饑賴東
籬金石渠燕窩曰洗來白遜三分雪剖處形同一瓣蓮
姜春舫粉菌曰蘆芽雨後拳同茁篁籜風前白並彈
蠓山席上分咏吳野渡寒蛩曰大嚙宮商徵深儲碧綠
黃沈素芬醉蟹曰量爲無腸淺吳竹亭鮮蟬曰小得女

兒名吳介卿燕窩曰柳絮團團蘭蓮花辦辦銀繆子嘉
橄欖曰熟後青無改甘回味有餘李琴生金橘曰移根
難變枳熟色轉同橙懸處金鈴小搓來玉手輕江立亭
白鰕曰鞠躬懷本潔遺蛻夜能明吳子安野芹曰采歸
文士手獻盡野人心方花農海蛭曰取味別新陳吳曉
堂蘑菇曰烹雖枯亦鮮吳香畹黃麝曰管見疑窺豹書
來誤弄璋江松橋咏變蛻曰元黃成混沌爲朽化神奇
簷鍤芸烏鰕曰在胷分皂白出口起網緼隱豹寧須霧
從龍願作雲

蒲塘席上分咏石葱佩諫果曰甘應同蔗啖忠豈類蒿

斜沈東岩木瓜曰鉛粉憐渠艷瓊琚報我情陳柯山金
橘曰纍纍弦上彈箇箇手中錢朱漱坪蒲萄曰編珠羅
大小入口雜酸甜姚古鳳山楂曰赤欲爭仙棗酸微遜
若榴楊蓉仙霜橙曰老共丹楓隕酸同綠橘銜吳玉田
佛手曰托鉢歸香國拈花背酒缸吳香湖芋魁曰懶殘
煨熟後宰相十年需

蒲上銷寒吳玉田垂幕曰卧雪夜寒低不捲藏花香暖
密誰知鄭棣原阿筆曰口吻妙能通冷暖指揮活可走
龍蛇冒璞原炙硯曰江東雪積書還著河北春融墨漸
濃石葱佩煖酒曰莫愁冷比冰壺玉自有春回雪後天

姜琴南曝背曰春回野老風霜體暢比麻姑指甲爬吳
飴亭挿梅曰點綴雅宜高士手橫斜才稱酒人懷吳香
湖餉窗曰高卧人常驚曙色却寒方只補紗籠陳柯山
圍鑪曰喜我連宵添火伴任人終日笑冬烘姚古鳳窖
花曰漫嘲營窟成温室差喜藏嬌有洞房沈東岩煮雪
曰清趣何妨煨榾柮冷吟却合門尖叉朱漱坪補裘曰
集腋時逢漆線日拈鍼巧與伐毛同楊芷林鑒冰曰始
信此山無足恃才能如玉已遭攻楊蓉仙擁被曰絮敝
欲餉興祖紙學荒嬾搆子安文

東亭守歲周西笭新自學幕歸盆梅曰出山猶帶烟霞

氣閉戶能參天地心周琴生水仙曰分得梅兄香縷縷
展來蘭箭影亭亭姜種蘭爆竹曰但教卷軸胷中飽自
有雲烟手底生蘇雲巢門神曰光我門楣森戟戟寄人
簷廡屈英雄蘇竹君獸炭曰蹲處爪牙因火活襖來皮
鞞竟灰殘金石渠金錢曰若箇乞憐甘作弟果然有勢
可通神

林梓賞雨沈酌亭曰日如高士隱雲似旅人勞椿圃曰
人在洪荒世天開水墨圖閩仙曰聽塌鄰家壁憂沈下
澤田墨庵曰窗紙濕將破鐙光低漸圓密庵曰門扇宜
著屐窗暗罷觀書蔭秋曰衣微生酒暈地濕吐鹽霜希

倫曰魚將游釜內蛟欲起山中

蒲塘元旦集紫薇道院吳玉田曰詩從祭後初拈筆七
字壓座右葱佩曰情如丹轉成膠漆筆占春先試詠歌
沈東岩曰占雞令節團鷗鷺吐鳳文章射斗魁陳柯山
曰此日籌都添甲子昨宵歲共守庚申吳節亭曰幸屆
元辰同肇慶快登仙館共談經朱漱坪曰紀年詩好參
新歷鍊句功深轉舊丹吳香湖曰紅分丹竈添松火綠
襯椒盤薦野蔬姚古鳳曰未及辛盤供地主翻勞卯酒
治行庖楊芷林曰快園春信應舒柳玉洞靈符喜換桃
楊蓉仙曰選地會如登蕊榜紀時詩定播雞林沈敏夫

日渡江揮扇來吳猛奪席談經見戴憑

古豐咏夏寒顧咳吟曰蕉雪恰宜圖一處麥秋却已過
三旬徐蘭圃曰飲猶未可湯更水坐只能將席襯茵汪
春濤曰冰雖易解調須緩瓜縱堪浮熟尙遲吳榕邨曰
未秋紈扇捐何速當暑絺衣著尙難徐珠浦曰喜我論
交無熱客笑他曠職有爰官

東亭咏菊黃孺子菊籬曰篩殘老圃通宵月透出陶家
兩院秋金鍤蕉菊囊曰摘來冷艷縈懷抱收拾秋光在
箇中姜五橋菊屏曰花如錦障東西列秋在筠床左右
看姚麓樵菊觴曰壽稱栗里南山近香泛甘泉曲水流

周琴生菊枕曰宵來淡盡繁華夢秋老愁增鬢髮霜縹
淡書菊圃曰矮屋數椽鄰蟹舍斜陽一徑繫魚船姜種
蘭菊魂曰招來老圃疎籬外斷送晨霜夜雨邊倩女鎗
前人比瘦羲皇枕上夢疑仙蘇雲巢菊譜曰半由草莽
通家系差許梅蘭結弟兄晚節宜編高士傳秋曹先列
宰官名蘇竹君菊人曰淡交原可呼佳友瘦去真堪比
阿儂老圃同根排雁序濃霜染鬢笑龍鍾吳素卿菊鈴
曰陶令在官原有閨羅家欲鑄豈無金金鶴船菊溪曰
可能水味如人淡但覺秋心對爾深金石渠菊影日多
情應戀東籬月是夢何愁兩鬢霜

快園詩話卷三

江寧 凌霄 芝泉

蠓浦吟秋金葉山秋繪曰每到逢秋常病肺可能作畫
果平肝濃塗紅葉如花易澹染青天似水難梁湘屏秋
吟曰雁知拈韻先呈字蛩解賡歌亦有聲吳野渡秋漁
曰蘆積霜濃侵短鬢桃源花好憶前游沈素芬秋話曰
秋懷誰與話丁寧塵尾同揮倚畫屏蕉葉窗前茶再熟
豆花棚下酒初停月移童已垂頭睡霜冷人猶側耳聽
還憶聯床涼不寐論心挑盡一鐙青吳竹亭秋稌曰誰
將帽向龍山落我愛觴從雉水流莫使西風吹雁斷百

年兄弟好同遊方菊如秋鞍曰攀處舊思芳草地據來
輕稱薄棉衫汪半江秋簾曰病客長垂耽小坐玉人罷
捲怯新涼詹鐵芸秋樵曰穿入疏林雙屐冷挑來落葉
一肩紅李竹溪秋書曰雙鯉孤鴻羈客感碧梧紅葉美
人癡吳介卿秋步曰訪菊不辭歸路遠登山消受晚風
涼江笠人秋懷曰情牽荒渚離羣雁書託空江比目鱗
繆子嘉秋笛曰易使晚心生客館却疑秋思在鄰家吹
來隔岸風偏冷倚倦高樓月未斜睡起滄浪成一笑桂
花才放落梅花江立亭秋夢曰漸覺秋宵刻漏長迷離
夢境費思量鹿尋杳杳蕉無葉蝶化蓮蓮菊有香翠幙

低垂人中酒銀缸斜背簾生涼吟魂不畏霜華冷隨著
簫聲過粉牆汪逸園秋屏曰戲鴻字寫霜毫健射雀弓
開月鏡圓程山溪秋奕曰白門冷巷遺荒墅黃葉空山
有爛柯恰好學仙尋二叟纍纍霜橘滿園多洪吟竹秋
琴曰鳳求凰處梧枝老螳捕蟬時柳葉黃江子珊秋旅
曰曠野霜殘人跡裡亂山葉落馬蹄前吳曉堂秋展曰
敗葉堆邊聲窸窣繁霜濃處跡參差方花農秋渡曰負
販亂爭楓影外歸人遙喚荻花中孟春濤秋讀曰未冬
預作三餘惜吞月常懷一點清石新泉秋笠曰寬勝烏
巾風易落輕於團扇日能遮程湘帆秋爨曰枯桐焦尾

求原少落葉添薪掃漸多吳子安秋歌曰夜半繞梁驚
旅雁鐙前振笛和鳴蟲吳綠洲秋課曰秋風入座變春
風桂子香飄絳帳中暑退人堪勤學業宵長功好及童
蒙陳拙齋秋帘曰蒹葭影外懸江店橘柚香中認酒樓
徐生庵秋賽曰土席兒童分果栗茆檐婦女帶花翹石
書勲秋鼓曰月令三軍聽鼓令風高萬馬識悲聲撾殘
夜色同寒角擊破愁心異曉鉦徐詠堂秋佩曰萸能益
壽聊分艷蘭有同心愛擷香徐雪門秋角曰和月聽時
沙雁落帶霜吹處陣雲平徐蘭圃秋羅曰展幅碧於葭
外水著身薄似雁邊雲徐珠浦秋戍曰櫪馬嘶殘營外

柳霜笳吹瘦塞前山吳萍波秋心曰壯懷消熱宜捐扇
清夜刪愁似剝蕉

泰州咏春柳夏紅舫曰黃金世界添春色碧玉情人門
舞腰伸雲浦曰濃調新翠臨眉譜軟試輕雲作嫁衣謔
味堂曰一年小住春如海二月新陰綠到城張老蘊曰
已慣別離拚此日不堪攀折任他人許春卿曰詩心細
過風梳髮人意溫于絮著衣葉布帆曰憐伊生小貪眠
慣惹我愁添別夢多王左亭曰玉關有夢橫羌笛金縷
何人門舞衣陳書農曰不礙於狂才子態可憐絕瘦女
兒腰葉古軒曰那有風情能似爾縱無離別也愁人鄒

耳山曰千門曉色春如畫十里輕烟雨乍晴康瑞伯曰
韓翃歌成空有淚小蠻死後已無腰常達夫曰意態遠
傳臨水屋韶光先洩倚樓人羅夏園曰腰怯東風眠亦
舞眼空南國笑還顰僧煥然曰黃金乍布時偏暖青眼
相逢世有人

拚茶見冰結不甚堅繆儋亭咏曰轉因銷薄見玲瓏且
作萍浮錦浪中一片在壺心可問幾人秉鑑照能工禁
寒有士同春鰈借暖憑誰語夏蟲結不甚堅應易解恩
波回首謝東風

通州雅會西園余雅集詩八首末章曰翰墨因緣豈等

閒雲萍小聚便開顏心盟江海同流水目飽淮揚未有
山到處鴻泥留一爪他時驪唱播雙鬢游歸敢作驕人
語新自羣仙會上還

海門沈雙溪棐舉孝廉句曰幸沐恩波慚鯉躍潛消弊
竇畏犀燃弟棟字雲卿亦工詩海門士民多藉崇明詩
頗佳徐利親麥浪曰聲聲牧笛非漁笛牛背游來欲渡
難黃學詩秧鍼曰綺陌誰鋪新錦繡金鍼暗度大乾坤
徐經文述懷曰窮愧工詩假愁添強飲豪施發答友曰
老矣吾衰惟待鬼壯哉君舞爲聞雞張泳曰假館留賓
都作客異床同夢各思家又紅梅曰數枝艷改冰霜冷

一點丹留天地心折處依然憐歲暮望中便似已春深
沈霖曰身將隱矣文焉用貧亦安之病柰何董日申梅
妃曰不知南內傷心日猶憶疏枝冷蕊無沈霞自嘲曰
心慚食粟鍾無粟筆未生花眼已花沈思鎬菜花曰未
逢九日先看菊不是祇園亦布金黃誠金銀花曰誰說
世間黃白少此花逐日一番新沈偉秋夜曰更爲長吟
短螢從暗處明袁繼朝曰九日縱無人送酒一籬自有

菊迎秋

邗江爲客最久詩酒往來者極多不能全錄生平交半
天下而以邗江東海最多故有句曰友朋情意論江海

每笑桃花只一潭

張竹泉每招聯吟多不擇題流入俳體螳臂當車曰兩
馬力能雙斧敵大車視此一蟬輕螞蟻搬家曰里仁縱
擇多羶行樹大難移有撼心老鼠嫁女曰迨吉也如人有禮
雀角行來真似有人儀老鼠嫁女曰迨吉也如人有禮
子歸誰謂汝無家蝦蟆教書曰古文蝌蚪多奇字春草
池塘有妙詩

東亭單健堂僉判壯圖周寄庵明府右延余纂志遂染
風疾於志局一無所能尙解占句曰人趣已諳思作鬼
醫書無驗妄求仙衰殘轉羨貧非病疾苦方知沒是字

趙岐已合營生穴鑿齒真堪號半人無錢可贖典同賣
以夢爲游眠卽行紀事尼山將絕筆問年高適未工詩
五窮未備餘文學四體皆傷況髮膚一夜頓教生趣盡
中年尙慮死期遙骨肉流離朋友補衣冠拋棄枕衾親
兒子心癡祈病愈僕人身癯怨更長萬事念都消病日
三餘悔未讀醫書水鳥夜鳴疑鬼嘯天雞曉唱喚人醒
病篤之際語不能工見者諒之

余不肖不能承先人之志病後自思倍加慚愧非敢聲
揚不敢竊先世之功先祖所爲年遠無目見者不便再
舉姑就今人所見常挂齒頰者而言如甲辰乙巳傾囊

賑饑返負券三十七家養親族工匠一百餘口贈支安
縣公子馬肇平二萬金救父之獄漢陽同知陳酉山因
事戍巴里坤命族星源持萬金伴往竭貲贖罪以歸十
七莊田輪年讓租減小租斛此皆大母所爲雖用余名
余實未冠余長欲秉祖教家事漸非故助李氏僅三千
金不能復乃舍而贍其九口亦僅八年至赴都道中贖
歌女代完聚僅百金秦淮老人因失賊欲自溺救之僅
數十金耳如在快園欸賓饋饁乃朋情之常更無足齒
至若先人立法施棺散米及設有孚誠意雨水龍局皆
將百年余不能繼僅設滄源水龍一局實罪人也及出

游四方指囷分席者不可勝數而無一會到快園者故
有句曰那知含笑相迎者不是辛勤手種花

蒲塘同繪一圖者冒璞原石蔥佩沈東岩陳柯珊楊芷
林吳飴亭姜琴南朱漱坪吳香湖季學耘姚古鳳楊蓉
仙及余十三人吳穀人祭酒爲之記東岩名岱其弟飴
原岐早入翰林其子奕亭鏞入泮時余賀以詩曰笑看
鹿鳴秋讌裡老泉萍倒又東坡又曰來歲輓紅塵裡路
杏林重暢竹林歡東岩奕亭已卯同捷竟成詩讖

黃文貞公澄貴池人官侍中盡節後唐祠部建祠秦淮
上石坊刊一門忠烈翁夫人不肯辱身象奴投塞洪橋

溺死血淚滴石上影現夫人象高座寺僧以爲觀音供
奉許久崇正癸酉老僧感夢始移入祠汪玉屏咏詩曰
直同湘淚常凝竹不比山頭只望夫

舊院教坊規條碑今墮地猶記其畧曰入教坊者准爲
官妓另報丁口賦稅凡報明脫籍過三代者准其捐考
官妓之夫綠巾綠帶着豬皮鞋出行路側至路心被撻
勿論老病不准乘輿馬跨一木令二人肩之蘭溪弟詩
曰殘碑剩字亦茫茫舊院風流夢一場別有感人振觸
事豈徒瘞玉與埋香

水鶴杆在秦淮長樂渡鶴銅六十四斤栢杆八丈八尺

圍八尺鶴口對邨后井或言治蟒者長干塔鐙影落秦
淮與杆影交或言禳火災者杆上鑲作坎卦形則禳火
災近是嘉慶甲子清霽亭太守華重修詩曰屹立高杆
古渡旁杆頭銅鶴色青蒼井中蛇與河中塔留待千秋
細品量

閩魚逢閩年海濱必湧上無目死矣頭按十二生肖形
最大人不敢食其肉取以熬油有以骨爲橋者金亮夫
詩曰何時長養在重洋形肖年支百丈長不向天池化
鵬去只隨厄運學黃楊

尹望山相公梓二山詩趣其尤妙者咏雪曰北風陣陣

寒上天要吐痰一朝紅日出便是化痰丸又曰大雪往
下攏瓦溝漸漸聳黑狗身上白白狗身上腫咏電曰玉
皇想是無聊甚打箇火兒喫袋煙春曰春叫貓兒貓
叫春貓兒越叫越精神老僧也有貓兒意不敢人前叫
一聲紅帽哼哼黑帽哈老爺打道看梅花梅花嚇得忙
忙跪小的梅花接老爺

蟻山有送女嫁詩曰今朝相送爾從夫幾句良言要聽
吾妯娌看承同姊妹爺娘禮數事翁姑粗粗衣食能於
久薄薄粧匣勝似無一箇人家賢媳婦千金難買此稱
呼

庚辰夏宋之山招張翰山集小寓觀右軍字山長曰一
別十餘載相逢倍覺歡評書看晉墨問字破疑團祗守
安心法還加努力餐何時腰脚健買棹返長干太史曰
覓譚閒結伴舊識及新歡小渚當門靜清樽列坐團便
應忘主客底事勸盤餐彩筆論王畧淋漓氣象千余日
陋室惟容郝高人肯結歡千秋珠玉在萬里鷺鷥團病
喜賓忘禮貧勞友具餐瞻天驚望眼星聚此河干志鉅
曰喜賦高軒過兼承菽水歡臨書抽兔穎瀾茗試龍團
得接先生杖叨陪上客餐自慚疏禮節三拜學方干

快園詩話卷四

江寧 凌 霄 芝泉

送別圖余最富惜詩多不能備錄僅擇其情尤動人者
舉之并錄其名以示不忘

沌江送別圖王蓬心宸作太守詩曰凌子乘舟將欲行
綠波春水向東生柳絲濯濯憑誰折芳草離離爲我平
從此關山無遠夢而今梁月有深情四郊多壘真堪厭
選勝秦淮橋板橫此外賦詩者姚星岩左垣謝梅農登
雋孫元圃崙史赤霞善長王小蓬磨孫王影山岵孫張
映山琦嚴子進觀皆題圖上

蠟山送別圖黃柳溪楮作是日沈素芬大榮繆子嘉玉
成吳竹亭壽民吳介卿紹祖江立亭懋德買舟送三十
里始別竹亭曰衰柳折長堤斷雁聞南浦把酒送行人
銷魂別今雨憶昨君來時騷壇推盟主方幸飛將軍甘
與噲等伍三月共盤桓忘形到爾汝我不往寓齋君卽
來蓬戶只因聚首長更覺分襟苦知君難久留冀君少
延佇縱有別後書空言亦何補其二曰河干分手處黯
然立斜暉君亦不忍去我亦不忍歸君抱濟時暑指日
看奮飛交游滿天下寧傷知音稀獨我太孤陋落落知
已誰君來欣有託君去將何依茫茫千萬言欲語難致

詞願堅金石盟皓首以爲期介卿四首之一曰已唱驪
歌復挽留情殷不忍送行舟早知此去難爲別翻悔盟
心結鷺鷥孟春濤培松二首之一曰聽唱驪歌欲斷魂
人人惆悵夕陽邨別離淚化寒潮水直送征帆到白門
此外洪介石允恭吳野渡雲梁泖屏承綸沈素芬詹鎮
芸壽堂繆子嘉江子珊桐程山溪亮江立亭洪吟竹以
琅李竹溪鎔邱曉江溶吳曉堂暉吉方花農培孟襟五
吳子安綏祖李琴生嵩沈裕福詩題圖上

蒲塘送別圖季學芸標作是日惜別者姜小琴圻涕泗
滂沱鄭任堂伊泣下沾襟吳節亭瑞河姚古鳳鵬春朱

漱坪章令皆揮淚陳柯山佩珂曰相見尙嫌晚何堪又
送行青青河畔柳攀贈若爲情吳鑾坡世勲二首之一
曰話舊欣逢隔歲傷離又值今朝只覺吟魂黯黯怕看
春水迢迢楊蓉仙所折柳歌三疊之一曰折柳歌歌聲
譁臨歧握手生長嗟君重友朋如骨肉君輕黃白如泥
沙快園客與金同散跋涉關河誰是伴浪跡真同水上
萍熱腸孰贈雪中炭送君兮山之缺話到酸辛愁百結
鄭茗仙鎖臨江仙詞曰說到行期都怕聽誰知竟定行
期團圓幾月忽天涯春風催去鷁舊雨悵歌驪三十人
難留一客拌教鷗鷺分攜旗亭揮手暮雲低先生今去

去別夢尙依依朱漈坪一萼紅詞曰再商量把行期稍
緩休便上河梁我乍南歸君偏北向游蹤如此恩忙纔
聯得盟鷗十二怎東風吹散不成行幾月論心一朝分
手百結迴腸憶自殘冬把晤向紫薇仙館結下歡場夜
夜聯吟朝朝盡醉先生久住何妨這幾日風風雨雨竟
等閒潦草度春光猛聽一聲去也無那淒涼此外顧陔
吟崢吳玉田廷瑞鄭棣原棠鄭嶸洲錄冒璞原玉田石
蔥佩珩鄭耳山銃沈東岩岱楊芷林葯坪吳節亭姜琴
南薰姚古鳳吳鍊崖騏沈敏夫修來鄭任堂姜小琴姚
小鳳鸞皆詩詞吳香湖世傑駢體文一篇并載圖上

東皋送別圖
冒耕南耘德作石
芸亭渠曰夜來微雨更
瀟瀟惆悵何堪折柳條
夢裡有懷皆別感
鐙前無語亦魂銷
方期壇坫樽常合
豈意關河路漸遙
料想輕帆留不住
且拌沈醉盡今宵
石新泉熙準曰
瑟瑟感秋風
盈盈悵秋水
黯然離別情
魂銷不自己
君去留無計
君住歟
無禮僅賦五字詩
置君囊橐裡
詩成淚與俱
請君足少跋
今日共流連
明日空翹企
萬感不能言
身願化蘭芷
行行紉作佩
長路伴君子
此外石書勲
崇鼎黃楚橋
學圯喬雲客
普胡春岩萱
生江心止玉
章陳拙齋
鼎冒琴石兆
鯨石運南昌
圖冒筠壑鳴
黃佩芸端王
仙圖香

錢介三愛鼎傳柳橋祖緒桂小山經宗蕙亭佩鸞范藻
仙景瑗張蔚堂兆文鄭務堂大本范漱環榕僧松原女
史熊澹仙璉皆題圖上

南沙送別圖徐小蘭晚作徐展亭綽曰唱罷驪駒酒未
闌留君一刻且言歡相期縱飲還同醉減得離愁禦得
寒此外于秋渚泗繆松舟檣繆子卿毓才繆錫九軒沈
春芹香繆湘洲輻石澧原蘭繆壽泉注繆星泉堦沈子
容崇本繆綱齋錦繆倭亭輶詩載圖上

崇川送別圖楊邁渚廷撰作并詩曰河梁惆悵手初分
底事逢君又別君此後相思望明月天涯何處盼行雲

難迴空谷高賢駕誰是扶輪大雅羣怪煞風流都聞寂
并無狗監解知文其二曰西園讌集乍題襟聽到驪歌
欲罷吟擊筑悲涼豪士氣折梅振觸故園心紅塵莫憾
知音少白水徒慚我輩深祇有臨歧難作別依依相送
過江潯此外朱石甫瑋王晴岩鑑王燕鎬藻李元朗琪
各以詩贈

東亭送別周琴生序將作圖同人集海燕草堂余留別
詩四首其一曰千言萬語寄遙箋不及多留一見緣歡
會縱能如此日光陰容易過中年荒煙古渡人分袂寒
雨疏鐘客到船懷友懷鄉心兩地從今添得夢魂顛衆

見之惜別唏噓詩圖俱輟余至他處遂不以詩留別

余校過者畢秋帆宮保靈巖山人集余秋農明經羣玉山房集吳蒼崖孝廉叢綠山房集鄭漁濱副車養樸山房集顧湘船外翰花雨堂集朱蟬仙茂才襟山閣集黃孺子續東皋詩存徐升江詩洪介石詩江立亭詩徐珠浦詩顧陔吟詩宋之山詩貴魏卿詩詞

自著成者音韻異同測算指掌推步辨疑五音琴旨奕譜參評孫武子註河務今宜詩巢鳳集雲鶴集溟鷗集雪鴻集詞漪薇集曲振檀集古文剝蕉集時藝蓂桐集快園隨筆快園咏物詩快園詩話

余秋農旻用花隱軒韻贈余曰君才似海涵萬有珊瑚
木難蛟螭蚪奇光縹緲三神山怪象崢嶸五鼇首清似
珠光向月開輕如帆影臨風走有時萬馬踏潮來有時
羣龍掀波吼裒然大集錦裛成才是曹劉氣韓柳展處
千尋光照人讀來十日香生口解道箇語百可爲莫向
風塵悲不偶易逢鮑叔贈千金難遇陳思分一斗君於
此道得師資弇山制府倉山叟此中甘苦寸心知休任
旁人論可否我亦耽吟本性生築壇永遠相攜手追補
張君按日詩同斟白也論文酒

徐明齋鏐慶和韻曰芝泉才筆世罕有字草龍蛇篆蚪

蚪倚馬文章十萬言驚天詩句三千首織女機邊雲錦
張鮫人盤底珠璣走杜老長鑱賦慨慷王郎拔劍歌狂
吼文采風流花縣潘芳情旖旎屯田柳智慧胸藏照乘
珠淵源詞出懸河口露尾神龍豈易窺行空天馬原難
偶祇合賡揚向廟廊綠何塗抹謀升斗笑我官閒尋白
漚幸君年少非蒼叟但教努力愛春華莫逐時流問然
否十年儘費苦功夫七尺休辜好身手分道須先祖逖
鞭請纓願餞終軍酒

蔣蔣山徵蔚和韻曰大海狂瀾無不有縱橫字裡蟠蚪
蚪春潮疏鑿控龍門秋禊清高醉牛首君才真如萬蚪

泉湜籍汗流慚下走珠簾蕩漾落絮輕玉指奔騰忽雷
吼絕壁蒼黃竄狡獪大隄婀娜明花柳須臾風雨集毫
端呼吸收歸土囊口白藤織履走天涯如此佳游亦非
偶磨盾淋漓奏凱歌軍聲十萬傳刁斗歸來著書聊閉
關放浪時耽漆園叟相逢同泛秦淮舟往昔豪情猶在
否古寺親聯石鼎詩長城小試金湯手破帽休嫌白袷
衫接籬且飲黃花酒

洪稚存亮吉和韻曰卓犖鴻才籠九有尙搜活東注蚪
蚪當代疇操月旦評惟君合置風華首原知終與鳳鸞
羣何幸不遺牛馬走筆陣千軍背水陳詞源三峽犇雷

吼平居鏐F 裁雲到處嘲桃還謔柳但會莊生外物
心寧希鄒氏談天口鴟鴞一任嚇鷄雛桃梗無妨笑土
偶秀氣攸鍾本嶽河虛名罔濟空箕斗只愁青鏡換朱
顏轉瞬黃童成白叟分陰當惜我同然贈句難工君恕
否火候雖輪九轉丹推敲亦費八叉手潤筆無須白打
錢酬庸好醉黃封酒

孫淵如星衍和韻曰奇如崑崙立希有古如壁徑畫蚪
蚪妍如玉女眺清臚怪如木夫攢九首閒如竹院茶板
停疾如秋浦風檣走喜如穿林鳩鵲鳴怒如抉石獫狁
吼幽如廢苑繡莓苔麗如紅亭帶花柳妙如隱語山上

山奧如逸書口戕口品如佛貴爲世尊才如齊大非吾
偶君如登座散天花我如坐井窺山斗如思學劒遇援
公如愛觀棋逢橘叟慚愧才疏負眼高平生少可恒多
否到此驚看繡虎人從今盡歛探驪手儻許先停問字
車願來共酌論文酒

蔣青荃夔贈曰前輩風流在新詩許共評狂瀾迴百尺
五字築長城且盡樽前酒休嗟身後名青蓮今不作愁
思爲君傾

蔣雲榭福基由楚返吳與余同舟共作俳體詩蔣曰黑
夜長江道舟行又一遭趁風帆轉脚作雨月生毛童嬾

偷閒卧雞寒失曉號篙工爭用力奔走捷于猱余曰片
帆通夜挂不放順風開鼎沸一江水鞭驅兩岸山酒嫌
荒市澹語笑異鄉蠻起視西沈月遙空墮缺環

鐵嶺朱白泉觀察九日偕余同舟歸朱曰九日袁江放
棹回風風雨雨一帆開重陽不是端陽節也向中流競
渡來余曰佳節逡巡半客游持螯且自醉殘秋臨深忽
作登高想頭插茱萸上舵樓

余曾咏蘆花有句曰鋪作吳棉飛作雪一般飄泊有寒
溫後見方子雲先生有小庭句曰西下斜陽東上月一
般花影有寒溫

吾鄉冠坦之守尉磨趾有梅花百咏膾炙人口又有句
曰一栢之內有真趣七絃以外無餘音

閻隸闡觀察學淳有句曰春寒如戲典裘人

淮安程觀察公子蕙香名瑤瀟灑不羣有句曰底事當
筵歌折柳要他青眼送行人又曰青衫半掩相思淚偏
印當年舊酒痕

甘泉經子通名緯弱冠工詩有野水半潭星孤月淡如
人濕鳥帶雲飛春水畫船輕夢中得句愁忘却坐起呼
鐙枕上書等句佳句頗多餘見後卷

揚州解勗齋德昌句曰魚憐春色去水面唼飛花